

OLA

PULETINI A'OGA



19 IUNI 2017 ~ Lomiga 18 ~ Upega Tafailagi: www.ola888.com ~ Telefoni (03) 382 6674 ~ Tuatusi: saili.niupac@gmail.com; evaleon.books@gmail.com ~ E le faatauina ~ A Free Publication



FEILOA'I MA USO o le igoaipu a se matai Samoa ae faamatala ai foi aga o soo se feiloa'iga; aemaise na e aoga mo le fanau ma o latou lumana'i. I le ata le tofa ia Tupa'i Nuuausala, ma nisi o matua o loo lagolagoina le Power Up a Linwood, Kalaiesetete. E iai le eseesea i le auai o e matutua e lagolago mea a le fanau. O Linwood ma Hornby o le lua lea i totonu o le taulaga o togalaaui.

Lapelapea le ola maloloina o fanau i le ripoti a le UNICEF

Ua le tusa le maualuga o togi o Niu Sila i isi mea ma le pa'u maualalo o lona tulaga pe a talanoa i le ola maloloina o ana talavou ma fanau laiti.

E sili i le lalolagi i le maualuga o ana talavou e pule i le ola. Tusa ma se 16 e pule i o latou ola mai se ta'i 100,000 o lona faitau aofa'i. O se fua maoa'e pe a faatusatusa i le 0.26 le aumaliliu a le lalolagi i le 100,000 fua faatatau.

I vaega e iai le feoti laiti o fanau, pule i le ola, ma'i taulemafaufau, ma'itaga laiti, ma'i puta, sauaina i lima o e matutua, e tauva Niu Sila ma isi nuu na e iai Polivia, Sile ma Mesiko; o ni malo tauatia'e.

E tu 38 i le faasologa o malo e 41 e tusa i le lipoti lata mai a le UNICEF.

E tulaga 6 i le maualuga o fanau laiti e maua i ma'itaga, e ui ina ua fai ifo lea i le tele o malo i leni taimi.

I le itu i le ma'i puta e maualuga foi le pasene o fanau e aafia ai. E 32


pasene o fanau i le va o le 2 ma 14 tausaga ua mamafa tino ma isi ua soona puputa tele.

O le tasi tulaga e tu matilatila ai ai Niu Sila o le sootaga o fanau ma le tamaoaiga o le atunuu. E 16

pasene o fanau e o mai i aiga e le faigaluega. E tu 34 Niu Sila i le faatulagaga lea, na o Hunakeri ma Aealani e sosoo ifo ai.

I le tulaga i fanau fia aai i a'oga e 11 pasene o fanau i lalo ifo o le 15 tausaga e o mai i aiga e faaletonu le tausiga i taumafa o le aso. E 12.7 pasene le fua faatatau i le lalolagi aoao. Na o le 1.7 le eseesea.

E faapena foi i le tulaga i le pui puiga o fanau laiti e atagia ai le filemu, amiotonu ma



pulega lelei o se malo. I le itu i le feoti o fanau laiti i lima o tagata matutua, e tulaga 7 Niu Sila i le faatulagaga leni; e 0.78 le fuataga i le 100,000; o atunuu aupito leaga o Mesiko (5.98) ma Amerika (2.66).

A o mea e feoloolo ai Niu Sila o lena i a'oga, le mamā o le 'ea e manava ai, ma le tulaga tutusa o tama ma teine i avanoa.

I le itu i a'oga, e tu 15; sa faamauiina foi ni pasene maualuluga i le faitau, numera ma le saienisi talu le 2015; peita'i ua toe se'e ifo.

I le faasoaga tutusa o le tamaoaiga, e tulaga 26 Niu Sila. E 20 pasene e sili a'e ai le faasoa e alu i le 10 pasene aiga pito i luga, i lo lena o le 40 pasene o aiga pito i lalo. E iloa gofie le faapito o le faasoa i lea vaega taua. O Niu Sila le tasi atunuu e iloga le ava i le va o e maumea ma e leai ni mea.

I le tali atu a le malo i le lipoti a le Unicef na saunoa ai le minisita o Tamaiti, Amy Adams, e faapea, ua sauni le malo e faia soo se mea e faalelei ai le ola maloloina o fanau, aemaise latou o loo sili ona mana'omia le fesoasoani.

Ripoti o le Vaiaso:

Gasolo manuia fuafuaga faata'oto a Linwood Power Up

Na maua le avanoa o le sui o le Puletini e asia ai le Polokalame a le Power Up i Linwood i le Aso Gafua na te'a nei.

O se avanoa lelei e tilotilo ai foi i le galuega o loo fitaituga ai nisi o susuga aemaise le mamalu o matua.

I le manulauti a le Polokalame o loo tulimata'i le avatua o le fesoasoani i le fanau a'oga. Muamua, ia latou meaa'oga e aumai i le fale. Lua, i le faaleleia o o latou tomai i le su'esu'eina o soo se mataupu.

E amata le polokalame i le tuua o a'oga i Aso Gafua ta'itasi.

O loo faagaoiina e nisi o tama'ita'i ma alii faia'oga Samoa, mai lava i A'oga Amata e aulia le Kolisi ma A'oga Mauululuga. E iai foi ni uso faia'oga papalagi ua ofoina le fesoasoani.

I lona faatinoga, o le tamaita'i faia'oga ia Maria Lemalie mai le Kolisi a Shirley Boys e ta'ita'ia, ae lagolagosua i ai uso a faia'oga.

E faamalumu le faafeagaiga, Rev Makesi Alatimu, ma ni sui o matua.

Sa matauina le tulaga solo lelei o le polokalame mai lona amataga e tau i



O le afaigaluega Power Up a Linwood Karaiesetete

le iuga. E faalogo le fanau ma galulue i lalo o le ta'ita'iga a faia'oga.

Sa fesiligia le tamā ia Tupa'i Nuū Enosa i sona finagalo. Faapea mai Tupa'i, e fiafia tele e auai mai i le Power Up. Mo ia o se taimi aoga tele e lagolago ai le taumafai o si ana fanau.

“Ua alu le taimi o tamaiti e matamata ai i le TV ae le faitauina tusi poo se galuega e fai mai ai le fale,” o lana molimau lea. O le tofa ia Tupa'i e lotu

i le PIC a Karaiesetete ma e to'atele foi tamaiti o lana ekalesia e auai.

O le tasi itu sa matauina o le lelei tapena o le faamalositino mo le fanau. Saunoa Tuua Mark Tulia, o le to'atele o i latou e o mai sa'o lava mai falea'oga; e faamoemoe mai i le mea'ai o le Power Up e aai ai.

O le Power Up a Linwood e pito to'atele i le motu i saute; e tatala le avanoa i fanau uma ma matua e fia auai.

Saili Aukuso

Tapasa: o se faavaagalua mo faia'oga e talilelei ai mana'oga

O loo faia nei ni feutaga'iga a le matagaluega o A'oga ma le mamalu o matua e faatatau i se galuega o loo galulue ai.


E fia maua ni finagalo o matua i le tapenaga o se ta'iala fou.

Faaigoaina o le Tapasā, o le sini ma le faamoemoe o lea fe'au o le saunia o se fesoasoani mo faia'oga e faalelei ai a latou metotia ma faiga i le a'oa'oina o fanau Pasefika.

Talu ai le taua o le sini o lea ua pulunaunauina ai matua ma faia'oga foi, e faaoo atu ni o latou sao auā se tapenaga mae'ae'a.

E aveai ai foi lenei faaaliga ma se auala e faaoo atu ai le fanoga o le Matagaluega. E mafai ona pasi atu le puletini i se tasi e taua ia te ia lenei faaaliga.

Ae tusa ai ma le faamoemoe autu



o le galuega, o lenei ta'iala o le a fesoasoani tele i le galuega faifaatasi, aemaise le naunauga mo se suiga iloga i a'oga a fanau Pasefika.

O le to'atele o faia'oga o loo a'oa'oina a tatou tamaiti e le o ni faia'oga Pasefika. E faumalo pakeha Niu Sila i le pe a ma se 80 pasene. O la latou gagana muamua o le Igilisi, ma e to'atele e le 'a'u se silafia i tu ma aga faa-Pasefika. O le

faamoemoe lelei lea i tua o lenei taulagalaga fou. Auā o le ki i se a'oga lelei mo le fanau o le malamalama o le faia'oga i lana tamaitiiti a'oga.

Faaalia e le matagaluega e faapea o lenei tapenaga e fesoata'i tonu i anava a'oga a le malo e ave ai le faamuamua i le afaigaluega.

E pei ona taulagi e le National mai le amataga, e faato'ā tupu ni suiga i potua'oga pe a sui muamua faia'oga. E auala lea i o latou talitonuga i nisi fanau, ae faapea foi tomai ma agavaa e faatino ai le faiva. O lenei ta'iala o se tasi auala i lena tapenaga, ma e le o mailoa pe o se vaega lea o atina'e faalegaluega (PD) e faamalosia le auai o faia'oga uma.

E aofia uma faia'oga i lenei ta'iala, mai le tapulaa faamasani e tau lava i luga. O le soo lea e faaali ai sou finagalo:

www.education.govt.nz/tapasa

*Faasoa o le Vaiaso:***Sailiga mo 'a'upega e tapasa ai le folauga**

O loo tapena nei e le Matagaluega o A'oga se mea faigaluega fou. O se tasi mea fou mai lana lotoa o mea gaosi e tau tonu i le igoa Pasefika. Faapei o se fale gaosi taavale, e tali tofu le tausaga ma se fausaga fou. I leni tausaga le fausaga ua faaigoa o le Tapasā. E le o toe mamao se taimi ona faaalua lea.

A ua amata le faiva o Le'i'ite. O le mea o loo tilotilo uma i ai le aumatau fausaga, pe ni a ni vovoga o leni taavale fou; pe malosi, saosaoa, pe'i lona tekonoosi, ae pe to'afia se aupasese e ofi ai.

E faatusatusa foi i ulua'i fausaga, o nisi o na fausaga ua tutu nei i le solo e toe mau i totonu o laupepa o le tala faasolo; e malolo ai—e faatali le aso faamasino.

A faatusatusa i le vaogagana o mea faafitafita e mafai ona ave i ai le upu, o se 'a'upega. I nei aso ua fenoa'i sa'oloto upu, e mafua ona o le naunauga faaletagata mo se malosiaga sili; se mea e mamana pei o Maui; e moni ae le faafoliga; ua malolosi faafitauli; ua momoo ai i se malosiaga e sili atu, auā ua siliga ni tali i mea faigaluega masani.

Soo se taimi e tapena ai se ta'iala a le malo e ta'u ai Pasefika, o le tatalo a le to'atele, talosia o se tali malosi.

E mafua ai le fesili, e faape'i leni 'a'upega? O le tali mautinoa, masalo faato'ā iloa lelei i le isi faiga palota. O le taimi lea ua sasao le faiga malologa a ta'ita'i o le malo, ma i latou sa galulue i lona fausiaina.

Afai e iu ane e lelei, o lona uiga e mafai ona toe fuafua ai nisi fausaga fou e sili atu le malolosi. A leai, e saili foi ni o latou avanoa i le tusi o fausaga faaleiloga.

Ae iai le faamoemoe i leni fausaga fou. Muamua, e le fesiligia le poto o lona sini; e pei ona faamatala le lipoti (itulau e 2), o leni ta'iala o le a tapasā ai le galuega a faia'oga e tusa i le fesaga'i ai ma le fanau.

Lona lua, o se faailoga pe ā o le aga'i ina liuliu alo le malo i mea o loo tagi atu ai faiganuu Pasefika. Talanoa le malo i le taua o faiaoga i le faia o ni suiga, e ao foi ona lagolagoina lelei i tupe e faafae ai atina'e faalegaluega atoa ma alaga'oa e tua i ai latou.

E iai ni faia'oga papalagi ua vave faailoa lo latou talisapaia o le Tapasa; o se mea ua leva le tatau ona fai; auā e taua tele le malamalama o le faia'oga i lana tamaitiiti, faapea mai latou. O le ki lea e tatala ai le faitoto'a i le lalolagi o foliga eena o loo nonofo mai i o latou luma.

O le a le faafitauli lea? A o le a lona tuga i se faitauga lautele?

O leni. Pe a ma se 70 pasene o faia'oga a Niu Sila e na o le gagana Peretania e saunoa ma faatino ai le faiva; atonu e sili atu, ae e le fesiligia le faumalo o le gagana Peretania i mea uma taua'oga. I lena to'atele e mautinoa ua na o sina pasene faatauvaa ua tofo i se potomasani faamaoni o le olaga faa-Pasefika i tu ma aga. A o le to'atele e leai—pe ua na o se sootaga e faafoliga pe faata'eta'ealuga.

E iite le faasoa i le anotusi o le Tapasa; e le pine o ni fautuaga mo faia'oga e malamalama ai i tu ma aga a nuu Pasefika, talitonuga ma mea faapena.

Masalo foi o se ta'iala e tuusa'oloto mai i ni noataga i le Taiala Aoa, e tuu foi le avanoa i a'oga e faaofi ai ia latou foi ta'iala ma polokalame. Lona uiga e leai se poloa'iga malosi o lona fa'aaogaina pe faitauina foi. Ona atagia lea o se popolega i nisi o le aumatau. O le lave i le tele o ta'iala o le le fa'aaogaina; tele tomai ma agavaa na sasaa i ai i le tapenaga ae leai se malosi e una'ia ai o latou faamoemoega sili.

Ua ta'ua le Tapasa o le Faavaagalua; ua faa-Samoa ai le Framework, o se upu malosi i le gagana Peretania; o le fesili, e faapefea ona avea ma se faavaa malosi e galueina ai ni sini maualuluga?

E manatu le faasoa e faato'ā 'anoa ma aogā le Faavaa pe a vave atia'e sea malamalama mai le taimi e tapena ai faia'oga a o lei ulufale i le faiva.

Ua talanoa le malo i le siitia o le tusipasi faia'oga i le MA, e tatau foi ona aofia ai ma so latou silafia i mea tau Pasefika. O se mea tatau le ofo atu o ni pepa e politeki ma iunivesite i mea tau Pasefika, ma togia o se vaega taua o mataupu mana'omia. Avea foi o se faasili taua i 'CV' faigaluega, e iloa ai le ua agavaa.

E fesoota'i nei ma faaiuga a le ausu'esu'e i le tulaga tutotonu o tu ma aga ma gagana a fanau ia avea ma vaega o le a'oga.

Ua faaigoa le fausaga leni i le tapasa, o le upu Samoa e faatatau i le meafaigaluega sa faatonu ai folauga a tua'ā anamua. E talitonu sa filifili ma le faaeteete le upu e le matagaluega, talu ai e ono aveina sese. Ne'i faapea se isi o le tapasa lea i le Motu o Ausiga Maoa'e; ae iloa ane ua na o se ta'iala.

Ae tatau te le iloa poo leni tusi e maua ai le tali o le fesili, O fea o alu i ai le vaa?

“mafauauga o le vaiaso”

O le lotofuatiaifo o le tapasa lea o tagata.
Vincent van Gogh

*Tulimanu o Pola***Toto foa'i ma le autala'i, tapasa, Pole ma le palota**

E fiafia e faafeiloa'i atu i leni foi taeao i le suafa o lo tatou Alii ma le Faaola, o lē na foa'i lona toto e ola ai le lalolagi. I leni vaiaso na faamanatu ai e le lalolagi le taua o le foa'i atu o se matāua o lou toto e ola ai se uso o loo fia maua i taimi o mafatiaga. E iai nisi lotu latou te faasa lea faiga. Ia, tailo. Ae fai mai Van Gogh e leai se tapasa e sili a'e i le lotofuatiaifo lelei. Afai na faamaligi le toto o le Alii e magalo ai tatou, o le a se isi faata'ita'iga e sili a'e? Fai mai foi ia, E le sili a'e se alofa i lena e avatu lona ola e sui ai lana uo. E le faigata ona faavasega le mataupu silisili o na tuleiga a le Alii i le mataupu ua ta'ua.

Mafua la'u tala ona o se talanoaga ma ni mafine tala'i. Ia, e faigata tele ona talanoa ma se tasi ua mau lona taofi i se mataupu. I so'u taofi, e foliga ua le fa'aaogā le meaalofa a le Alii i le tagata, o lona lotofuatiaifo, lea tatou te iloa ai le lelei ma le leaga o se mea, ina ua tautu i se mau a se lotu. O afea o le a tatou sa'oloto ai mai uputuu a isi, aemaise pe afai e fetoa'i ma lo tatou tapasa i totonu?

Na vave lo'u oso e faitau le faasoa o le vaiaso ina ua ta'u le upu Tapasa. A o faasolo la'u faitau sa ou vaaia Maui o loo tu i luga o le vaa ma tilotilo i le Tapasa i lona puimanava. Ai lava se maoa'e o le vaaiga i o tatou tuua i taimi o a latou folauga. E fau tapasa i fasilaau e galulue ma fetu faasinoala, e maua lelei le itulagi e aga'i i ai le malaga.

O le uiga o la'u tala, e leai se Malaga e sē pe a iai le tapasa; tusa foi pe pa'ū le tapasa i le sami ae iloa lava e le tautai le ala auā ua masani.

O leni la ua faaigoa ai le ta'iala a le ofisa o A'oga a Niu Sila; ua tumu a'u i le fiafia. Lea ua maua le 'a'upega e su'e tonu i ai le mea o loo tu ai lo tatou vaa. Afai o le Anetatika, lona uiga ua leai se faamoemoe. A o le mea sili ua iloa. Pe tia'i ai loa ae faafou le konelakate a Noa e toe fau se isi vaa. Na o le Tomatau a Samoa na ou faalogo i ai, ae pei lava e mumusu latou e fa'aaoga le upu Tapasa; ona o mafuaaga na. E leai se minisita a'oga e fia iloa le mea o loo tu ai le vaa.

E iai se lipoti na lafo mai i lo'u ofisa, e faapea ua ova le faga measuamalie o fanau i totonu o DayCare.

Faaauau i le itulau mulimuli

O se faasoa lautele mo le mamalu o le aufaitau:

O loo feagai pea le aganuu Samoa ma lu'itau o suiga. Ae fai mai le muagagana e afei ai, e tumau faavae ae sui faiga. O le mau a isi e afaina faavae pe a sui le faiga. O nisi ia o a tatou tu ma agaifanua e masani ona fetufa'i ai ma nisi o la tatou aufaitau. O le a sou taofi? E lelei lea suiga fou ua iai pe leai? O a ni au mafua'aga?

1. Ua tatou masani i le upu a o tatou tina, 'Nofo i lalo ma 'ai. Pe faapea foi, Nofo i lalo ma tagata. O le fea e afua mai ai lenei masani? E iai fono a nuu poo aiga foi ua fai i luga o nofoa. O le a sou taofi i lea suiga?

2. Tu i luga e faaali sou taofi. E masani ona tupu lenei i ni fonotaga faalelotu. E tuufaafegai ma fonotaga faaleaganuu e saofafa'i ma fai. I le lotu e foliga e faaloalo le tu i luga ma faaali sou manatu. O le a sou manatu i lea fetoa'iga a aganuu e lua?

3. I Samoa a tuli se tama e ta'u se fe'au e masani ona ui mai tua o le fale. I nei taimi ua iai fale papalagi, ua ui sa'o i luma isi ma tu'itu'i le faitoto'a pito i luma. O le a se faasinomaga lelei mo fanau i lenei taimi?

4. E masani ona vaaia tina o faapulou le fa'ata i le solo, i po uma lava. E faatonu foi fana e 'aia le salua le fale, pe seluselu ulu i fafo i le masina. Aua le tusi lou lima i se tuugamau. Ni mea ea faaSamoa nei? Sou taofi?

5. Tuu lou nofoa i le tagata matua e ulufale atu i le pasi. O se tasi foi tu ua iloa ai Samoa e tagata tafafao mai fafo. E mautinoa o le faaaliga o le faaloalo o e talavou i e matutua. A ua vaaia foi le faia o lea e nisi matua i e talavou. O le sa'o lea?

6. I aso la e su'e masima su'e aniani tua'oi e oo lava i le tauaga ma le tuai. I nei aso ua tau le vaaia nei aga. Pei foi ua matamumuli e fai. O le a sou taofi e tusa i nei suiga? Lelei pe faale lelei mo le aganuu ma le va fetausia'i o loo malosi ai?

7. I le tu o faaloaloga, ua sui e le faguinu le niu (su'iga), e oo lava i Samoa ua fa'aaoga e nisi fagu uaina. Ua sui ai le uiga o le mau i le niu ma lona sootaga i le mau tuufaasolo. O le a sou taofi? Po ua saga faafaigofie e nisi le aganuu? Pe faafaigata foi?

8. Ua masani i le talanoa faa-Samoa e le aumai sa'o pe tuusa'o se manatu ae faataamilo mai o pei se aiuli i se faiga siva. O a ni malosiaga o lea faiga poo ni vaivaiga foi i nei aso?

9. I le tele o afioaga i le Tuamasaga e taunapa le aumatutua i le otona o soo se lau e fa'aaoga i gasesega o meataumafa. E oto le si'usi'u o le laulu'au, le laufa'i e afifi ai lu'au ma le pe'epe'e. E malamalama lelei latou i le faapogai. Fai mai nisi o le ifo i tupua. O le a ou sou taofi?

10. I aso la sa taotoo tua'a i paepae o maota ma laoa, i nei taimi ua a'e mai le faiga o le taotoo i totonu o maota e alala ai foi le aiga ma e o soifua. Pe o se soo lelei lea o le faiga tuai? O le a sou finagalo?

11. O le sakē ma le poula o nisi o siva a Samoa na vaaia e le lotu Kerisiano. Pe na mafua lea ona o le vaa faale aganuu Egelani i ia taimi i le aga feusua'i o se mea e leaga; pe faapea foi o se mea-alofa lea a le Kerisiano ia Samoa i le amio pulea? O le a sou manatu?

12. I aso e lei mamao atu sa manino le tiute o fanau i taimi o talisuaga, e fai le vai fafano ma tautua matua ma e matutua a o tali le sua. Ua suia nei ina ua fai laulau ma nofoa ua faata'ita'i foi i le faapapalagi. Pe aafia le aganuu pe a mou atu lea tu?

13. Sa le masani ona auai faifeau o alalafaga i fonotaga a nuu ma ona upufai. Sa le ta'ia foi ni sua ae momoli o latou inati. I nei aso ua matauina ni suiga. O a ni itu lelei, o a foi ni itu e ono opuina ai?

14. Ua tauave e le lotu le aganuu ma le gagana i nuu fou ua aumai ai. Ua tula'i mai foi nisi tofiga e iai le tiakono o se tofiga taualoa e pei lava o se matai. O a ni itu lelei i le taulamua o le lotu? Faamata e iai ni afaina mo le aganuu? Aemaise foi o le lotu ma lana savali?



O se ata mai le dezines_by_tau

Tatalo


Le uo mamae ua leva
ona mafuta mai
i itula ma tausaga le mafaitaulia;
i le tautotogo o lagona mamā
ma mana'oga faigofie;
i le tauvevela o tu'inanau
faatalavou le mafaatua'oa;
e aulia le taumaalili o aga saisaitia.

I vaipanoa uma o le lalolagi e mafai
ma le oo i ai le mafai;
i tumutumu o tuasivi ausigata ma
lalo ifo o tofe lilifa ta te fetapa'i ai;
i augutu o le vai moomoo e
taele ai le tufanua ma le tupu—
tainane e faivavale o la mana'o;

O o'u mana'o o ou foliga ia
O a'u miti o ou moomooga ia
E te gugu e te gagana e te fiafia e te
tagi talatala;
A ou valaau a ua leva ona e lagona
mai a'u
E te tula'i mai e sufi a'u
E faamalolo a'u
E faamafanafana a'u
E faalototele a'u
E te faamauolua foi ma faamagalua a'u;

I le matalasi o ou foliga
Ua ou fausia ai se faasao matagofie;
E le moomia ni tapasā poo ni tali
faaaliali.

LPS Tavita



18—24 IUNI

- 18
1999 North Harbour NS. Malo Niu Sila i le Manu, 71-13
- 1997 Apia. Talanoa Tofilau Eti i le 2AP mataupu i tusifolau
- 1888 Faavae lotu Mamona i Leone, Tutuila
- 1881 Taua o le Nusipepa tauina i Saoluafata
- 19
2000 Niu Sila. Laga i le maota fono mataupu i le Faamagalo o tagata Pasefika ova aso; lago-lago e le NZ Herald
- 1936 Umusa le Malumalu Katoliko a Falefa
- 20
2007 Tauto Tui Atua Tupua Tamasese mo le tofi Ao o le Malo Samoa
- 1972 Uluai fono palemene i le maota fono fou

- 21
1919 Ripoti le Samoa Times i le faama'i oti: 7,542 maliliu i le faitau aofa'i e 30,636
- 1900 Sisi le fu'a a Meleke i Leone, Tutuila
- 22
1968 Faailoa e le ofisa o A'oga le toe lauliliuina o le faiga o a'oga a Samoa
- 23
1999 Lau le iuga faamasinoga mataupu i Salamumu: 33 o le alii e 44 na molia ta'usalaina i solitulafono e iai le sunui o meatotino ma le faaoolima
- 1927 Faaunuu i Apolima sui o le mau—Faumuina, Afamasaga Lagolago ma isi
- 24
1936 Faaleaogaina e Tanapulu le poloaiga e ta'u ai le Mau o se faalapotopotoga fouvale
- 1935 Maliu Sulusi (Aiono Dr Erich Shultz) i Siamani

E atoa i le vaiaso lena le 18 tausaga talu le mea na tupu i le alalafaga i Salamumu. E tusa i ripoti a nusipepa o le taimi na tula'i mai se eseese i le va o se aiga ma e na lagolagoina, ma le fono a le nuu, ona o se mataupu e aafia tonu ai aiatatau sa'oloto a tagatanuu e pei ona puipuia e le faavae. I ripoti a ni nusipepa na faamatalaina ai le faatinoga o le pule a le fono i ona o'oga, e atagia lona malosi i le tu ma le vaai faalenuu Samoa. Na mafai i le ava fatafata ona fai le tiute o leoleo e taofia ai i latou uma na faaooina le sala faalenuu. A o le aso 23, 1999, na aumai ai le faaiuga a le faamasino, e 33 o le 44 na faamaonia o latou moliaga. O moliaga e aafia ai le sunui o meatotino ma le faaoolima e mafua ai ni manu'a.

Ae le na o le pau lea o se afioaga ua tupu ai sea mea; i Salafai na tupu ai foi ina ua tuua'iina se vaega i le le usita'ia o le poloaiga a le faamasinoga; a o le nunu e faapogai mai i le va o le nuu ma lea vaega, na molia ai e le nuu i le tulafono. I nisi mataupu e tula'i mai ona ua tasi le nuu i se sui tauva ae faasalaese nisi. Lesona: E le o faatasi le Pule faamatai ma le aia faatemokalasi. E iloa lea pe a fetoa'i le lua, ona 'au lea o le Tulafono i le Aia faatemokalasi. A o le lave e le malu ai le tagatanuu i se faaiuga a se faamasinoga. Auā e sili le tiga o le ta'usalaga a se nuu ma tagata o loo mafuta i aso uma. Ae manatu le to'atele e mafua ona maopopo nuu ona o le Pulega faamatai. I le fatu o le pulega faamatai lona tulaga mamalu ma le taualoaina o se pule e māta'utia e tagata uma. Afai e paoina soo e le malosi faatemokalasi, e ono lafoa'iina ma le toe amana'ia ai le aganuu. E lua mea ua matauina le va soo ai o le fogavaa, o lotu ma palota. Atonu e mafai ona faatonutonu nei vaega i ni tulafono e faigofie ai i pulega faamatai ona fai faaiuga e nofo lelei ai tagata uma. E faasao ai foi mai le faalumaina pea e ala i le Tulafono.

E faamanatu le tala faasolo, e ui ina faigata le toe manatu; vagana ua tulimata'i le lesona taua: e leai se mea e tupu e alu maumau—e iai sona aoga mo le aga i luma.

Samoa Entry/Molimau mai isi

Iuni i le Tala Faasolo o Niu Sila



- 20 Iuni 1987. Malo Niu Sila Olopeleki i le Uluai Ipu a le Lalolagi
- 21 Iuni 1964. Taunuu le fa'ili o le Beatles i Niu Sila
- 23 Iuni 1961 Saini e Niu Sila ma malo e 11 le feagaiga e puipui ai le Anetatika

NIUPAC PUBLICATION

Email: evaleon.books@gmail.com
 Phone: (03) 382-6674
 Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
 Muliagatele V. Fetui ~ v.fetui@auckland.ac.nz
 Saili Aukuso ~ saili.niupac@gmail.com

EVALEON BOOKS & NIUPAC PUBLISHING

Telefoni (03) 382-6674. Imeli: evaleon.books@gmail.com




Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.

Sponsors:

New Zealand Lottery Commission

Evaleon Books & Niupac Publishing





PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA

Talosaga tamaiti i le Pope e faafo'i mai la latou pea ta'aio

E le masani ona tasi se tama ma se tene latou i le pope e faafo'i mai la latou pea ta'aio. Ae a o'o i le mea e peia i nisi o le tasi faafo'i, pe fa'i mai o Mose poo le pope e tasi lava i ai.

O le vasaaga a le Pōlu 2 i le a'oga a Ellman i Tamaiti e le o fa'afu. Sa malaga lo latou fa'afu i se tafoga, afa ai le Vaikano (o le afa lea e afa ai le pope i totonu o le malo Italia). Sa alu ma ave la latou uo (o se pea ta'aio). O le fa'afuaga e pu'e mai se ona ata i totonu o le Vaikano, tamane pea pu'e mai se ata ma le pope.

Ae e le masani le fa'afuaga, o le mea ua tasi ua fa'afuaga i se loto i le pea ma tog'i se pa'utasi. Na fa'afuaga ma le malaga a le fa'afuaga ma afa ai se tagata e le vasaaga i le mea ua tasi se pea. Ma tonu ai loa o le a tofi se tagata ma se tasi se loto i le pope.

E pei la ona malaga le ata o i luga, i nisi o tasi ua tafoga. I le ata i luga se pea o lo'o afa i se tasi.

O Pope Faraniisa ua loa o se ali'i fa'i mai le fanau o le pea tene i e fiafia i tamaiti, atonu o lena ua fa'i ai luga le fa'amomoe o tamaiti ma le latou fa'afuaga.

esse le fiafia e fa'afuaga i le latou tala e fa'afuaga i ai. Ai o le mea lea ua tasi ai le tamaiti malaga.

Afa foi ua lele e mafai lava ona tasi ma se latou tamaiti afa, pu'e mai se ata o le pope.

Masani na fa'afuaga i le latou ona fa'afuaga o se poma i le loto, ae leai, o le pea ua na gaoi to'o o tamaiti.

Lipoti fa'afuaga—Catherine Greenwell, Staff 63



Igoa: Tupac Shakur
Aso Fanau: 16 Iuni 1971
Ausiga: Ta'uta'ua o se alii faimusika i fatuga Rap
Fetu: Timini

O Tupac Amaru Shakur o se faimusika Amerika, ma o se tasi o taleni iloga i lona faiva. Maua luga le viia o lana taleni e le aumatau e iai le Rolling Stones, o se lomiga faitau taualoaina i le lalolagi. O ana pese e faavae lava i mea moni tutupu i lona si'osi'omaga. E atagia ai le olaga faigata i totonu o vaiaai e nonofo ai le aumatitiva; aga o sauaga ma faafitauli e o faatasi, ae faapea foi mataupu faa-Amerika e iai le faailogalanu e feagai ma tagata e le o le lanu pa'epa'e. O ia o le fofoga o ona tagata e faaleo atu la latou tete'e e ala i ana fatuga. O ia ma ona matua o ni sui o le Black Panther Party lea e afua ai le Black Panther a Niu Sila. Faamauina se 75 miliona kopi o ana pese na mafai ona faatau atu lalolagi aoao; faamau foi lona igoa i le Rock & Roll Hall of Fame a Amerika. E le gata i le musika a o ia foi o se tama i ata tifaga. Na maluu i se pulufana mai se taavale, e mafua i eseese faakegi, ia Setema 13, 1996.

www.ola888.com

ATI A'E UPU

palemia. Vasega — nauna. Uiga: o le ta'ita'i o se faiga malo poo se pati faaupufai. Mai le upu Peretania—premier. Soa Peretania—prime minister. Ua avea le palemia a Niu Sila ma se matai Samoa.

Mai le tusiupu, Samoan Dictionary GB Milner

Tulimanu o Pola

O loo tau faavasega e lo'u mafafau le sootaga o le lipoti a le UNICEF ma le tele o ma'i o loo afaina ai le fanau. Ia, e ese le faigata o lenei mataupu, auā o le upu a Samoa o au o matua fanau, ae fai mai le aufatusolo, o le alofa e suamalie. O le sootaga malosi lea. E peisea'i a le avea se lole i le fanau ua tatou le alolofa. Manaia le faata'ita'iga o loo fai i Power up, na o le faguvai, talosia e ave ave ai lea masani.

O se tasi o lipoti e faapea mai ua afaina le sipela a fanau ona o tesi (texting). E faavae lea i se su'esu'ega sa faia i totonu lava o Niu Sila. Ia, o se lu'i lea mo soo se gagana ma i latou e nafa ma ia mataupu. E feoloolo foi si faamimigi ia a tatou. Pe le o le amataga lea o le iuga o gagana? Pe alu a'i tula'i mai nisi gagana fou e ta'u o faamimigi? Pe faapupu foi? O le uiga lea o le finau a nisi faamatua i le gagana, e taua le toe foi i tua i auala tuai e a'oa'o ai gagana; a'o tauloto le sipela, le faatele, ona faasao mai ai lea i le gagana faatesi.

Talanoa faamama'i mai le uso laitiiti ia Pole i le tulaga o lana pati. O Pole e pele lava le Leipa ia te ia. O lona taofi, e leai se mea o faaletonu i le pati, o loo lelei foi lona ta'ita'iga. Ae o lona manatu e mafua lenei ona o suiga o le taimi. Ua sui le taimi ae e le o suia le Leipa. O le faa-lavelave auā e mafai e isi pati ona gaoi ana anava masani ma mau tauave. A lelei le tamaoiga lona uiga ua leai se mea e finau ai. E le fesoasoani foi le ata o le faipa'aga ma iuni, aemaise i se tulaga e matilatila i luma i le vaai.

Ese mai le Greens e apo e talavou ona o le fesoata'i o ona sini ma faafitauli o le taimi, e iai le ea mafanafana ma le puipuiga o le si'osi'omaga. Faapena foi le NZ First, leai se mataupu vevela e tusa ma na e lamatia ai aia tataua i latou e ona se nuu. Aumai Trump e fai ma se faata'ita'iga. A o le Leipa o loo talanoa pea latou i mea tau le loto—alofa, fai mea tutusa, iuni, ma mea uma na. O le lave lena, a tele tupe, e faigofie lava i le malo ona oole Tagata. O le manatu e tuufaatasi tagata uma i vasega ua le toe fesoasoani foi. E ese mana'oga o faia'oga Pasefika mai papalagi; e ao ona taula'i i mana'oga ta'itasi ae le o le ta aofa'i.

O la'u fesili mulimuli ia Pole poo le a le uiga o le upu, tataua ona sui. Na ia aumai le ata o le leoleo i le Terminator; e mafai ona liu i soo se mea e fetau ma le si'osi'omaga.

Ia faafetai lava Pole mo lou sao. Lelei lena, alu e fesili ia Little pe moomia se paina. Se'i faatupu le malosi a o totoe nai aso. Pe oo ane i le palota ua liua ma palemia fou o Niu Sila. O ai na te iloa?